

# Kontuola

ANTZUOLA / Egubakoitza / 2004eko otsailaren 20a / 190. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

## Erantzukizunari buruzko programa, gurasoendako

AINTZANE IRIZAR

Hamabost bat gurasok dihardute Herri Ikastetxean, familian erantzukizunak banatu eta lankidetzaren sustatzeko programa baten. Euskal Herriko Unibertsitateak jarri du abian programa hori. Antzuolaren kasuan, Herri Ikastetxearen eta Pausokaren laguntzarekin.

Orain dela aste batzuetatik hona, martitzeneko elkartzen dira herriko hamabost bat guraso, erantzukizunaren gaineko programa horretan parte hartzeko. Hamar martitzenetan elkartuko dira, eta bi orduko saioak izango dituzte.

Euskal Herriko Unibertsitateko hainbat irakaslek egindako ikerketa baten ondorioz sortu zen programa hori. Etxeko, elkarbizitzako, erantzukizunaren eta lankidetzaren gaineko ikerketa egin zuten irakasleok, eta horren ondorioz sortu zuten orain abian dagoen programa.

Martitzeneko, hainbat gai lantzen dituzte gurasoek, adituen laguntzarekin: familiarterko lana, seme-alaben parte-hartzea etxeko lanetan eta bizitzan, komunikazioa familian, autoritatea eta diziplina, familiako gatazkak...



ARTXIBOA

Seme-alaben eta gurasoen erantzukizunaren gaineko gaiak aztertzen dituzte.

### PROGRAMAREN HELBURUAK

Programa horrek hainbat helburu zehazten ditu: etxeko lanak banatzea, parte-hartzea eta lankidetzaren zelakoak diren aztertu eta horiek hobetzeko estrategiak

ikastea eta lantzea; seme-alaben motibazioa suspertzeko prozedurak ikastea; gurasoen jarraitza eta komunikazio trebetasunak hobetzea, arazoei eta gatazkei aurre egiten ikastea...

## Gurasoen iritziak programaren gainean



**YOLANDA MINER**  
ETXEKOANDREA

Gogo handiz hasi naiz programa honetan. Dena dela, etxetik kanpo lan egiten duten gurasoei zuzenduta dago, batez ere. Etxean lan egiten dugun gurasoen gaineko ikuspegia sumatu dut faltan. Hala eta guztiz ere, programa interesgarria iruditzen zait.



**MIRARI LAMARIANO**  
LANGILEA

Atsedean hartu, gauza berriak ikasi eta familia osoarendako onuragarria izango delakoan eman nuen izena programa honetan parte hartzeko. Gustura nabil. Nik neuk ume txikiak ditut oraindik, baina hemen ikasitako oso ondo etorriko zaidala uste dut.



**KARMELO MUÑOZ**  
LANGILEA

Aita bezala, nire ardura dela uste dudalako eman nuen izena. Gustura nabil. Gainera, irakaslea gizonetzkoa izanda, gizonetzko sentimenduei ere garrantzia ematen die. Hura ere asko dabil jartzen bere aldetik, eta askotan, identifikatuta sentitzen naiz harekin.

## LABUR

### Sagardotegira irteera antolatu du Gazte Asanbladak datorren martxoaren 27rako

Sagardo denboraldia aurrera doa eta Antzuolako Gazte Asanbladak ere sagardotegira irteera antolatu du martxoaren 27rako, zapekoa. Ekitaldi horretan parte hartu nahi dutenek etzira arte, domitua, dute izena emateko. Mox eta Larrea tabernetan, hain zuzen ere, jarri dituzte izena emateko orriak Antzuolako Gazte Asanbladako kideek.

### Pilar Etxaniz antzuolarra, Aralar-Zutik koalizioko hautagaia Kongresurako

Martxoaren hauteskundeetan, Aralar-Zutik koalizioko Gipuzkoako zerrendetan, bigarren tokian, aurkeztuko da Pilar Etxaniz, Kongresurako. ZUTIKeko Batzorde Nazionalako eta Emakumeen Talde Nazionalako kide da Pilar. Baita Saharako Lagunen Elkarteko eta Mugen Gainetik gobernu kanpoko erakundeko kide ere. Herrian, hala ere, ikastetxeko zuzendaria delako da ezagunagoa.



### Txorikua etxea botatzen dihardute

Astelehenean goizean hasi ziren Kalegoiko Txorikua etxea botatzen. Etxea eraisteko lanok astelehenerako amaitzea espero dute Udaleko arduradunek; Sagasti eta Kalegoi lotuko dituen errepidea egokitzeke, berriz, beste astebete behar izango dute hori bai, eguraldiak laguntzen badu.

Gauzak horrela, pare bat aste barru, dezente aldatuko da herri barruko zirkulazioa; izan ere, alde zaharretik Sagastirako lotunea egingo dute Txorikua etxea eraitsitakoan; oraingoz, behin-behineko errepidea egingo dute hantxe./A.I.



# Aratusteeek Txarri dantza ekarriko digute aurten

AINZANE IRIZAR

Etzi, domeka, ospatuko ditugu Aratusteeek herrian. Goizeko hamarretan hasiko dituzte ekitaldiak; eguerdian, Oinarin dantza taldeak antolatuta, Txarri dantza egingo dute hainbat herritarrek, plazan. Sorgin dantzarik ere, noski, ez da falta izango.

Aurten, Arrasateko Txarri dantza aukeratu dute Oinarin dantza taldekoek Aratusteeek ospatzeko. Arrasatearrek Santamas jaietan egiten dute dantza hori. Hainbat herritarrek parte hartuko du ekitaldi horretan. Txarri dantzarekin batera, urteroko moduan, Sorgin dantza ere egingo du mutil talde batek.

Ospakizunak 10:00etan hasiko dituzte. Ordu horretan, kale-



Domekan, Herriko Plazan, ikusi ahal izango ditugu Aratusteeetako dantzak, 12:30ean.

jira hasiko dute dantzariak, hartzak, tximinoak eta animalia-hezitzaileak, txistulari taldearen

laguntzarekin. Ekitaldi nagusia, berriz, 12:30ean izango da, Herriko Plazan.

## KIROLA

### PARTIDUAK

#### FUTBOLA

Aratusteeek direla eta, oraingo asteburuan ez dute partidurik jokatu herriko futbol taldeek.

#### PILOTA

Otsailak 21 (Udaberri Saria)  
17:00: Olalde-Mundarro (Kadeteak)


### EMAITZAK

#### FUTBOLA

Antzuola 3 Idiazabal 3 (2. erreg.)  
Eibartarrak 3 Antzuola 2 (Kadeteak)  
Antzuola 0 Almen 1 (Neskek)

#### PILOTA

Escolartekoa  
Eskoriatza-Olalde (Infantilak) . . . 18-12  
Udaberri Saria  
Golerri-Olalde (Kadeteak) . . . . . 12-22  
Andazpe-Olalde (Nag. eskuz) . . . 22-10  
Landare-Olalde (Nag. paletaz) . . . 9-35



### Antzuolako taldeen web orriak

Antzuolako Gazte Asanbladak eta Antzuolako Askatasunak euren web orriak dituzte Interneten. [www.latako.com](http://www.latako.com) webgunearen barruan daude bi talde horien orriak. Besteak beste, talde horiek antolatutako ekitaldiak, argazkiak eta abar aurkituko ditugu orrialde horietan. Horretaz gain, Bergarako eta Debagoieneko beste talde eta zerbitzu batzuen gaineko informazioa ere badago webgune horretan. /A.I.

## LABUR



### Begoña Egaña ETB2ko saio baten ikusiko dugu

Martxoaren 7tik aurrera, ETB2ko *La flecha amarilla* lehiaketan parte hartuko du Begoña Egaña antzuolarrak. Hamabi lehiakidek hartuko dute parte lehiaketa horretan, eta Santiago-bidea bidea egingo dute.

Oraingo astean bertan, astelehenean, jakin zuen Begoñak bera izango dela hamabi lehiakideetako bat. Eguaztenean, berriz, irudi batzuk hartzera etorri ziren Antzuolara, lehiaketarako. Zera azaldu zigun Begoñak: "Bi aldiz pentsatu gabe aurkeztu nintzen lehiaketarako, eta *casting* bat zer den ikusteko gogoia ere baneukan".

### Pello Zabala hitzaldia izango dugu Olanen etxean, datorren asteko eguenean

Datorren eguenean, hilak 26, Pello Zabala izango dugu herrian. *Klimatologia eta tenporak* hitzaldia egingo du, Olanen etxean, 18:00etan. Euskaraz eta gaztelaniaz egingo du berbaldea. Gizon politafetikoa dugu Pello: meteorologian aditua, Arantzazuko fraidea eta musikan aditua da, besteak beste.

Jende askok egiten dio kasu Pello Zabalak egunero egiten duen eguraldi iragarpenari; baita tenporen gainean ematen dituen azalpenei ere. Eguenean, horren guztiorren gaineko azalpenak entzun eta, nahi izanez gero, galderak egiteko aukera egongo da Olanen etxean.

### Eski irteera antolatu du Arrolak martxoko lehen astebururako, Candanchura

Aurten ere eski irteera antolatu du Arrola mendi elkarteak. Martxoaren 6tik 7ra egingo dute eski irteera hori. Candanchura joango dira, eta aterpetxe baten egongo dira, El Aguila aterpetxean, hain zuzen ere. Martxoaren 6an, zapatua, irtengo dira, 05:30ean, eta domeka iluntzean itzuliko dira. Zapatuan bertan, iritsi eta eskia ztera joango dira.

### Gorringo taldearen ipuin kontaketa saioa egongo da bihar, zapatua, liburutegian

Udal Liburutegiak antolatuta, ipuin kontaketa saioa egongo da bihar, zapatua, liburutegian bertan. 18:00etan hasiko da saioa, eta Gorringo taldekoek *Antonino Apreta* ipuina kontatuko dute.

Gaur, egubakoitz, bestalde, Potxin eta Patxin pailazoen ikuskizunaz gozatzeko aukera izango dute umek, 17:00etan, herriko Udal Pilotalekuan.

### Bidezko merkataritzako produktuak jarriko dituzte salgai Herriko Plazan, domekan

Etzi, domeka, bidezko merkataritzako produktuak salgai jarriko dituzte Anelkar Antzuolako Elkartasun Taldeko kideek. Aratusteeetako ekitaldiekin bat egingo dute, 12:00etatik 14:00etara jarriko dute saltokia.

Harreman Gobenuz Kanpoko Erakundeak bidezko merkataritza bultzatzeko Arrasateko Maxi Eroskin denda bat dauka. Handik ekarriko dituzte produktuak Anelkarreko kideek, domekan saldu ahal izateko. Denetik egongo da: jakiak, artisautzako produktuak, dekoraziokoak, arropak...

**Jose Gomez Abad**

Errekalde 6, 4-B.  
Antzuola  
943 76 60 19  
943 76 60 43  
Faxa:  
943 76 60 19

INDUSTRI MANTENIMENDUA

**LEKY-BERRI MERENDEROA**

Janariak eta edariak

Tf. 943 76 60 94  
ANTZUOLA

**EGAÑA**

Era guztietako arotz lanak

Tarima eta parketa jartzea  
Zoruen kutxilatua eta barnizatuak

Kalegoi 21, ANTZUOLA Tel.: 943 76 64 23